

續金華叢書



續金華叢書



金華黃先生文集卷第三十六 續彙三十三 續金華叢書

墓誌銘

臨川危素編次

番禺劉耳校正

贈文林郎江浙儒學副提舉許公墓誌銘

前進士許廣大爲武義之明年以內艱去銜哀致辭於予曰昔吾父之棄諸孤也廣大年甫十有七後八年乃以非才叨綴末第獲備官使又十有四年始用例贈吾父文林郎江浙等處儒學副提舉封吾母宜人廣大祇奉命書將以告于墓下且求時之文人勒諸貞石以昭先德而侈上恩詎謂吉凶同域吾母遽以疾不起風木之悲罔極奈何忍未卽死以終大事願推述吾父啟慶儲祉源流之所自及吾母爲之欣助者合而銘之惟許氏遠有世序其占籍台州路之天台縣莫詳所以徙提舉公諱嗣字繼可曾大父某大父某父某俱弗仕自曾大父時以子孫眾盛俾人專一經故許氏明經者代不乏人提學公少受尙書而於諸經無不通然未嘗資以事進取爲名譽朝益暮習皆爲己之學其爲人純慤靜重不妄言笑動以禮自持父喪哀

殷骨立衰麻之制哭踊之節必求合於古諸弟尙幼撫育訓誨至于成人而授之以室先世所遺貲產惟其所用無斬賓祭百須及門戶事悉身任之諸弟咸感化而父事焉其教子尤篤延師必一時名人躬承事之如弟子禮寢疾病之前三月預爲詩示廣大詩僅百四十言而處已接物之道靡所不該廣大佩服不敢忘訖能有所樹立擢元統元年進士第調昌國州判官以選入行宣政院爲掾史用資格序遷而來武義居亡何百廢具舉刑清訟簡民安其業受知上官見謂廉能皆提學公之教而宜人相之也宜人張氏同邑宦族提學公之歿率諸子奉窀穸惟謹事舅姑以孝治家勤儉而有法待宗黨恩意甚至遇貧乏必周之諸子旣蚤失所怙宜人遵遺訓戒勵之尤切廣大在武義迎致宜人就養每晨出必告之曰臨事貴詳審不可奪於私喜怒莫歸則詢于僕隸有少不厭其意輒戚戚不樂前是武義數有水患謀作隄以捍之而或者憚其勞費先聖廟及學舍屢徙而多未完欲繕治崇飾之而或者以爲非所急廣大慨然以爲己任宜

人曰德惠未施於人而並與土木之役得無爲民病乎後知廣大以
身先之而人樂趨事乃喜其賢有識如此談者多謂提學公雖老於
山林而貤恩所及在其身後一門之內死哀生榮可以無憾矣予竊
觀其示廣大詩有曰金馬誇豪貴吾謂非世傑惟能師古道乃與禽
獸別然則穹官峻爵固非其所慕惟後之人能以斯道自任以古
人自期乃其所望也廣大既有以成其志曷可無一言以慰之於泉
下乎提學公卒於泰定二年七月某日享年四十有五以其年十二
月某日祔葬于某鄉龍山八世祖墓次宜人卒於至正六年七月九
日享年六十有九以某年某月某日合葬焉子男三人長卽廣大文
林郎婺州路武義縣尹兼勸農事次彌大喪明而卒次小戊方業儒
女一人適趙景良先卒孫男一人益浩女五人提學公有詩若干卷
因其自號名之曰得靜齋集潛嘗序其篇端以爲清高而不失乎迂
平實而不近乎俚茲故弗論獨序其平生大概而銘之銘曰
許出太岳古之封君後以國氏世多顯人公居盛時乃不有聞卒不

以施藏器於身爰有淑德媿于名門克生材彥孔敏而文惟君子使
有社有民潤澤實豐水必有源逝者如斯不亡者存龍光下賁躍於
無垠公侯之復在爾子孫龍山之原歸焉丘墳木則已拱合祔惟新
歸歟同穴表以貞珉

贈從仕郎某官陳府君墓誌銘

至正八年秋故贈從仕郎某官陳府君宜人張氏以其子文杰官七
品並膺贈典於是府君之歿三十有六年宜人之歿十有一年矣文
杰使以狀來曰先人之葬已久而墓上之石未有刻辭文杰自惟無
所肖似非敢效昔人之有所待茲幸昭被上恩賁于泉壤皆先人積
累所自致又非敢竊以爲功也惟所以發潛德之幽光者不宜無述
敢奉狀以請願畀之銘按狀府君諱某字某世居常之晉陵曾祖某
祖某父某皆業儒至府君乃以醫名家府君於書無不涉獵病時人
溺於場屋之文絕去弗爲嘗慨然曰仕將行吾志以及物也而不可
必得幸而得之又未可必行吾志可以及物而又得以必行吾志者

惟醫乎乃求良醫而師事之洞究其術人以疾來告不憚風雨寒暑
囊藥以往或有以報之輒謝曰吾志不在是也府君性純篤甫十歲
父母相繼亡毀瘠如成人墓在永升西鄉去家六十里廬其旁而朝
暮上食事之如生至元十三年國朝取宋之兵至常州府君挈家避
地姑蘇中途與兵遇兄姊妹及從弟四人俱爲所虜府君傾家貲求
得之同居三十年恩義無少替常州已降而復爲宋守主將怒屠其
城府君母族妻族及其師之家皆無遺類府君還哭之曰吾恨不得
與俱死也歲以城陷之日爲位于別室以祭焉永升冢舍毀於兵鄉
人或據其故址而犁爲田府君不與校惟日夜至其處號泣而已有
憐而問其故者愀然曰吾親託體魄於此吾不孝無以動人而使至
是敢不自咎乎其人聞而愧悔乃以地來歸府君酬以錢比常直三
倍復爲屋其上而墾田以給饋祀不廢府君家居尙儉素所服惟布
衣出入無輿馬或勸稍廣其田宅以爲子孫計輒應曰古人謂賢而
多財則損其智愚而多財則益其過吾固不欲損其智況忍益其過

廿二史劄記卷三十七
三
故府君生於宋淳祐二年九月十一日卒於今皇慶二年七月二十
有九日享年七十有三以某年某月某日葬于安定西鄉之姚墅張
宜人有淑德後二十有五年卒合葬焉子男二人長文照次卽文燕
今爲從仕郎池州路東流縣尹女二人適鄭天錫鄒通德孫男二人
在室女若干人一適湖州路南潯鎮巡檢夏某餘未行予觀府君平
生志在澤物及遭值變故又能以義赴禮而處之各盡其道終於隱
約而以子貴成身後之名豈非所謂積善之報不在其身而在其子
孫者歟文燕方以材見用於時所以追榮其親者未見其止姑以其
所已至者敘之如此銘曰

身之不達志則已施時之孔艱義有必爲自其族姻逮于師友德之
在人所積已厚擇術也良及物也深擁其餘祉被于來今荷天之休
流光未艾尙不一書以謹登載

廣福司提舉封奉訓大夫太和州知州周公墓誌銘

公姓周氏諱方平系出吳偏將軍瑜瑜子都鄉侯胤失侯而徙廬陵

廬陵今爲吉安路吉安之有周氏自胤始有仕隋爲會稽太守者曰汾翁忤煬帝屏宜春人之復還廬陵後五世乃自廬陵之烏東遷泥田又九世當宋元符崇寧間有與中書舍人劉公才邵並游太學者曰諤楊文節公慕其遺風而爲之追賦浩齋者也浩齋子遂良是爲公之高祖曾大父諱叔度大父諱椿年當江南臣附之初事會轆轉强家大俠來時恣橫獨能以儒生爲狂瀾之砥柱公私咸賴焉父諱琦母楊氏公其長子也幼從名師教以先涵養而進於義理之學壯歲嬰家務以幹蠱自任凡稅賦徭役田廬貲聚小大眾事無不身親之稍閒則延名勝之士與居與游由是聲譽日廣仁宗時駙馬都尉瀋陽王嗣主高麗國事署公爲本國西海道勸課農使公幡然曰方今車書大同朝廷以高麗望國俾得自除吏此豈非仕國乎旣至京師忽慨然曰吾親老矣不可遠涉鯨波重貽膝下之憂竟辭不赴居數歲用薦者得旨以公爲廣福監丞比出命先令供職時方立重名爵之法上以廣福所掌摹造梵典爲東朝集福之所特命勿拘此制

尋復有旨周方平儒者其速授以命書諸人無得援以爲比公感上恩而恪恭所事及監改爲司留公爲提舉公黽勉就職旋即辭歸泰定元年也公在京師十餘年尊官顯人若程文憲趙文敏諸公皆略名位與交公初未嘗有所攀援以求進也旣歸遂不復出里有櫟谿族人列居兩旁乃因面勢治亭臺作新樓榜曰雲泉優游家林二十餘年將終諸子咸侍受所欲言公曰子孫以和順相保家事從叔父則吾無憾矣以至正四年十二月十二日卒享年六十有五明年九月二十四日葬于新淦州揚名鄉石洞之原公性孝友割田畀龍雲山僧以奉祖考忌辰敬承先志敘次家譜聚族居泥田者千餘家散處他郡者倍是尊卑遠近無敢紊者鄉鄰有艱厄必周給之公初以子九鼎貴封承事郎吉安路同知太和州事暨加封奉訓大夫吉安路太和州知州飛騎尉永豐縣男已不及受練祥之日命適下哀榮兼至焉夫人李氏唐西平王晟之後亦自宜春來徙與公家爲世姻夫人善綜理家事公父子無內顧之慮而得以成其官業者夫人之

助也夫人初封宜人加封永豐縣君以至正六年二月某日卒享年七十有三十二月某日祔葬于其鄉赤石潭先墓之次子男七人長紳永順安撫司蒙古字教授次繕皆前卒次卽九鼎以村受知丞相韓文忠王補宗仁蒙古衛儒學教授今以累遷爲奉訓大夫婺州路總管府判官次茂次厚次復次總宜女四人適曾嵩李繼善李晚李傑孫男九人女十二人曾孫男三人公年十七而舉子三十九而抱孫未六十而曾孫生歲時家慶甥孫中外訖訖在列人以爲積善之報九鼎至婺而潛方以老不任事得謝而歸書來俾銘公墓潛幸獲受廬爲氓安敢以衰朽荒落辭謹以公族孫鄉貢進士聞孫之狀序次如右而銘之銘曰

周顯於吳以奇材稱遙遙千載乃用文鳴垂芳四葉學優不仕逢時奮興自公兄弟人皆好徑公避弗趨天語褒嘉命之曰儒公方退讓仕不擇祿時止則止返吾初服碧溪泠泠飛雲湧泉俯仰自得踰二十年榮光下賁由公有子揚名之鄉公其寧只

贈承事郎同知奉化州事葉府君墓誌銘

君諱應咸字心可姓葉氏處州麗水縣人葉於處爲著族君十世祖
襄自松陽徙麗水遂占籍焉高祖冠宋季再領鄉薦善言性理而尤
深於易有起進士至敷文閣待制者曰宏其伯兄也曾祖一鳴舉進
士未第而卒祖正大登仕郎父天與仕皇朝爲美化書院山長秩滿
當教授一州輒棄不就母青田潘氏宋秘書丞復之曾孫文君少有
經濟志嘗慨然曰窮經將以致用也非精無以造微非篤無以道遠
乃發先世遺書朝誦暮習凡聖賢授受之奧古今治忽之幾至於儀
章度數圖書歷象靡不研究山長公知其將適於用試使綜理家務
外內脩飭日有餘暇山長公正衣冠坐堂上子孫環列左右俾君援
引經傳典故參以當今事宜而訓戒之雖隆寒盛暑不廢前史官鄭
陶孫以子壻銘登仕公之墓稱君通朗秀潤詳雅善幹蠱人以爲無
媿辭科舉初行有司以君充賦試不合以親老不復入場屋專意色
養甘旨之奉必夫婦躬親之或燕飲他所遇時新之物未薦於祖未

進於親者則不敢嘗子弟守以爲法天歷戊辰山長公卒旣祥禫益
不出築室萊山之西扁曰肖堂蓋山長公自號則堂君示不忘也母
氏生君而卒君始生之日卽母之諱辰每至其日必變服號慟如初
喪子孫無敢言稱壽者始君旣失所恃登仕公之侍人方氏鞠育之
及長事之如母奉繼母王氏曲盡孝敬撫諸弟有恩教子有法第三
子琛爲通政院宣使至順辛未以公事自上京至江浙行省便道省
侍君曰父子天性也五年一見面豈不願爲旬日之留然簡書有程
小子初仕不可不戒抵家之日卽命遍謁先墓信宿遂行且告之曰
能愈加廉謹以自持則可再見我如今日矣琛去又五年未及再見
而君以至元乙亥四月庚申卒於家得年五十有二臨終以山長公
墓石未刻屬諸子緒成之語不及其他又明年丁丑十二月壬辰葬
于某鄉岑原之清風臺去家五里而近娶同邑湯氏雩都縣尹垓之
女有婦德生與君同歲後君六年卒合葬焉子男四人長珂蚤卒次
玘後君五年卒次卽琛別名伯顏由歙縣丞辟行中書省掾史考滿

而遭君之喪服除乃得調今爲承事郎處州路青田縣尹次瑾未仕
女二人壻曰湯奎何達孫男六人女三人曾孫男三人君所爲詩文
有棲閑集一卷其言務去健羨而甘澹泊不事華藻以諧世好也琛
官正七品法當封贈父母如其秩至正九年春得請贈君爲承事郎
慶元路同知奉化州事君配湯氏爲宜人其明年琛用治最受知憲
府諉以覈田於吾婺之屬邑會予歸自京師乃奉君妹婿松江府儒
學教授練晦孫之狀來謁銘狀稱君材可用世特以切於孝養寧隱
不仕故所施僅及其家傳曰是亦爲政奚其爲爲政君蓋有得其旨
矣惟夫知君之深是以言必以實而不苟過爲夸大可謂善敘事者
也予何能贊一辭庸備著其語而作銘以系之銘曰
士之爲善兮不與名期積久必發兮名斯我隨君則有材兮又有其
時曷賈弗售兮卒以不施安常處順兮乘化而歸儲祉實多兮嗣人
之貽寵靈所加兮長世光輝樹此碑板兮昭以刻辭

贈從仕郎浙東道宣慰使司都元帥府都事趙府君墓誌銘

今天子至正二年肇修祖宗故事肆命有司復用科目收天下士於是趙生由欽首以國子上舍爲左榜釋褐第一循舊制授七品官因得請于朝贈其父教授府君爲從仕郎浙東道宣慰使司都元帥府都事曩予忝備員學官與由欽有斯父之雅故由欽求爲銘以表于墓隧予不得辭府君諱孟賚字仲良姓趙氏其先宋之宗室世爲汴人自燕恭懿王六世至宗正少卿贈金紫光祿大夫子英始不緣屬籍而以材自奮擢宣和某年第嘗爲台州黃巖縣丞遭靖康之變遂家焉人卽其所居以爲稱曰西橋趙氏宗卿生朝請大夫知南外宗正事伯洙則府君之高祖也曾大父諱師雍朝議大夫直寶章閣贈容州觀察使大父諱希聖宣教郎史館校勘贈清遠軍節度使封吉國公父諱與口咸淳七年進士調鄂州州學教授仕皇朝至翰林學士嘉議大夫知制誥同脩國史贈禮部尙書上輕車都尉追封天水郡侯諡文簡永國閭文康公復實誌其墓母史氏贈某郡夫人府君性醇慤幼侍文簡公至京師巖然如成人稍長讀書務博覽強記而

明其大義不資以爲辭章時新製蒙古文字頒行未久鮮有能通之者府君一見曰此聲音之學耳試習之輒精其藝用薦者授温州路蒙古字學教授非其志也文簡公欲使涉歷於政事姑遣之官府君拜辭怵惕不忍遽離左右到官數月忽若有動於中卽日解印綬還侍旁文簡公果屬疾府君晝夜奉湯藥無少懈疾竟不可爲遂薨貧無以具喪事賴朝廷賜賻給驛乃兄返葬府君平居事母孝母畏雷焚香侍立終日不去歲時祭祀以禮治家處置有法盛暑必冠言無諧謹由是子弟未嘗敢有惰容褻語待賓客樂爲之傾盡與人交以誠有持物來售者給以高價如數酬之其人深自媿悔後不敢復爲欺鄰家僞爲契券據所賃隙地而有之終不與校人服其長者紛爭不決多求質焉或遣子弟來見必戒飭使敬謹無失皆嚴憚之娶范氏順德唐山人僉雲南諸路肅政廉訪司事范公震之女封宜人婦道母儀見稱於宗黨子男四人長出鑑紹興路儒學錄次出銳次出由欽初補從仕郎台州路寧海縣丞秩滿改調汝寧府潁川縣尹次

中鎬孫男五人宜浚宜汶宜涿宜泮宜瀕女三人宜涉逖同郡吳明
遠宜潤宜汜府君嘗與宜人往省范公於鎮江因留居焉重紀至元
之二年十二月二十日以疾卒於寓享年六十有四諸孤以某年某
月某日奉柩權厝於丹徒縣崇德鄉之釜頂山初世祖皇帝既定江
南有以文簡公名上聞者召至上京奏對稱旨卽以爲翰林待制尋
陞直學士進侍講學士數陳讜論深契上衷眷遇益厚特命官其一
子府君兄弟三人文簡公之歿也伯兄孟實既有官序遺澤次當屬
府君輒以讓其季弟孟貫服除調漳州路蒙古字學教授亦不赴浮
湛里閒二十餘年而終伯兄後累遷朝列大夫廣海鹽課都提舉季
弟今以通議大夫祕書卿致仕獨府君仕而弗顯乃以子貴卒享身
後之榮由欽方妙年而進用於時勲恩所及未見其止談者率謂此
造物乘除理所必至其果然耶夫理之在天固不易知觀其善讓而
能廉蓋有合乎人道之好謙君子之有終者不可使後之人無述焉
此予所以不辭而爲之銘也銘曰